

TSE-HA DE: Mo Lo Do Lo Fo

Ni hǎo! (*Moin!*)

Liggt ja nu al 'n Rieg van Jahren torügg, ik was daar noch heel neet geboren, daarom kenn ik dat Verhaal ok blot van Grootvader, man wat de vertellt, dat tellt. Daar is neet an to twiefeln.

In de Provinzhooftstadt leevde dotieds en Dokter, de heetde A Leng Lang, un de satt daar mooi in 't Huus van de Provinzregeren, wied weg in d' Noordwesten van China.

't gung um dat Dörp Mo Lo Do Lo Fo, daar leevden na Menen van de Zentraalregeeren in Beijing to vööl Minsken mit 'n verkehrde Sichtwies up de Welt. Wall de Hälfte van de Inwohners daar hungen wiss un wahr de verkehrde Partei an! Dat kunn ja wall neet angahn, so de Boversten in Beijing, so ok de Handlangers in de Provinzhooftstadt, un so – natürelk heel vörn weg: Uns Doktor A Leng Lang. Un he harr 'n Idee. – De Idee: De mutten minner worden, disse Inwohners van Mo Lo Do Lo Fo! De een un anner achter Tralljen, de een un anner bang maken, de een un anner doodhauen – helpt ja all mit, man up de Düürte mutt dat noch beter. Un de Idee harr he, un ok de Künn daartoo: Tsuang Ste Li Li Sa Tio heet dat Verfahren bi de Chinesen, Tsuang Ste Li Li Sa Tio. –

So wurr dat maakt.

Dann kwamm de Grote Krieg, dann was de Grote Krieg vörbi.

De Lüü harren anner Sörngen as Tsuang Ste Li Li Sa Tio.

Wi weten, dat nix blifft as 't is. De Minsk kann sük verannern, un um so beter he dat kann, so beter. Villicht neet an besten, man heel good kunn dat Dokter A Leng Lang.

Na de Grote Krieg leet he sien Handwark susen un funn 'n heel anner Profession: He wurr Heimatförsker. Daar hett he ok sien Verdennsten un kreeg Loff un Ehr un Priesen. He kunn stolt wesen. Nafolger van Dokter A Leng Lang wurr 'n Sett later de Dokter Bi Li Se.

Bi hum kwamm weer 'n heel Sett later en junge Mann, de mehr weten wull. Mehr as all annern bit daarhen. An Wo Yak mit Naam, de wull weten, wat dat up sük harr mit de haast vergeten Tsuang Ste Li Li Sa Tio.

He frog de Minsken in Mo Lo Do Lo Fo, man de seen neet vööl, un he leesde in de Akten, un wat he daar funn, mook hum düll: Daar stunn 't all in – de Dokter A Leng Lang, wenn he neet sülvst 'n Verbreker was, harr he doch mithulpen bi 'n groot Verbreken – wat is Tsuang Ste Li Li Sa Tio denn anners?

An Wo Yak hett daar 'n Book over schreven. Daar harr he wall 'n Pries för verdeent, 'n Utteken. Man de Utteken hett ja Jahren ehrder Dokter A Leng Lang al kregen.

Un de Chineeske Landskupp meent, dat Dokter An Wo Yak de neet verdeent hett.

Women gǎnsschiè! - (*Wi danken düchtig!*).